



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

52. Kalenderwoche – ab 27.Dezember 2009

Ende guhd, alles guhd!

So, nu is Schluss mid lusdisch! Ibor zehn Jahre habsch fiehr dähn "blidzbungd" reeschlmäßig jede Woche de scheensdn Bierschbrische rausgesuchd. Fiehr die Schbrische, die voreffendlichd wordn sinn, da hamm de Klobbor ooch immor was gewonn - viele Jahre Guhdscheine fiehr mei Gabaredd, dann Guhdscheine fiehr Bier. Un mir ham ja ooch ma e Bieschlein rausgegähm, wo de scheensdn Bierschbrische drinne warn, die ehmsd bis daderhin geklobbd wordn sinn. Das Bieschlein - "Bierlyrik" - gibbds heide noch zu koofn. Un es gibbd immor widdor Leide, die das koofn dun. Die ganzn Jahre jede Woche! Bei mir im Gabaredd!

Also, wenn Sie jemand kenn, dähr e Liebhabor von hobfnhaldischer Lührig sinn... - bei mir in dor Gabaredd-Kiste kennse das Bieschlein noch koofn.

Wobei, die Schbrische zum Reischnbrandor Bier warn ja meisdens von annre Schbrischeklobbor - nisch bloß von mir. Isch konnde ja meine bersehnliche Brodugsdjohn von Schbrische so ziehmlich off Schbahrlamme runnorreeschln, weil ehm so viele annre eingeschbrung sinn - bei dor Schbrischeklobborei. Das is ja e Selbsdleefor gewähns. Mansche sinn wie sischdisch gewordn. Isch will jedzd ma keene Nam nenn, abor dor Andreas Haase had einische hunnord Schbrische vorzabbd, wens reisched! Dähr is esched abhängisch - scheinbar!

Meine eischen Schbrische sinn dann mähr die gewähns, die mor im Radjo bei dor Wärbung heern konnde. Misch dun manschma Leide off offnor Schdraße anhaldn un draachn mir een von meine Schbrische vor. Gesdorn kahm eenor mid dähm Schbruch:

In Schodderland man dähn Whisky liebd, weil es kee Reischnbrandor giebd!

Dähn hadde isch selbor schon lange vorgessn!

Insgesamd sinn in die Jahre e baar dausend Schbrische geklobbd wordn. Heeschdens e Zähndl hammor voröffendlischn kenn. Was da noch fiehr e lürischor Schadz vorborschn is... - villeischd wird de Nachweld das eenes Daaches zu wirdischn wissn!

Off alle Fälle duds in Deuschland beschdimmd kee annres Broduggd gähm, woderdriebor soviel gereimde Schbrische geklobbd wordn sinn. Un soviel Lühriggor wie bei de Schbrischeklobbor-Fesde im "Haus des Gasdes" in Rahmschdeen hads beschdimmd ooch noch nirschendwo off een Haufn gegähm. Jedzd is Bumbe. Nascha, Sie wissen ja, es had ehm ooch alles was middn Geld zu dun. Un grade ehm ooch was Wärbung bedreffn dud. Fiehr umsonsd is... nascha, Sie wissn schon.

Me ledzdor Schbruch is nu dähr hier:

Zwelf Jahre schbrudelde de Schbrischeklobberei -

das war Kuld un Margeding hoch drei!

Jedzd isses aus - finnie! - zu Ende!

Doch nur was schderm dud, wird villeischd Legende!

Eduard Sachsenmeyer